

ՀՐԱՆՏ ՕՀԱՆՅԱՆ

ՄՄ

Ս. ԷԶՄԻԱԾՆԻ ԵՎ ՌՈՒՄԱԿԱՆ ԿԱՅՍՐՈՒԹՅԱՆ
ՓՈԽՅԱՐԱՔԵՐՈՒԹՅՈՒՆՆԵՐԻՆ ԸՍՏ ՍԻՄԵՈՆ Ա. ԵՐԵՎԱՆՑՈՒ
«ՋԱՄՐՈ»-Ի

Ս իմեոն Ա. Երևանցի կաթողիկոսի (1763-1780 թթ.) հեղինակած «Ջամբու»¹ աշխատությունն արժեքավոր տեղեկություններ է ընդգրկում Ս. Էջմիածնի և ռուսական պետության միջև փոխհարաբերությունների հաստատման վերաբերյալ, որը Հայոց հայրապետի գործունեության կարևորագույն ուղղություններից է եղել:

ԺԸ. դ. Արևելյան Հայաստանը շարունակում էր գտնվել պարսկական տիրապետության տակ: 1747 թ. կազմակերպված դավադրության հետևանքով սպանվում է Նադիր շահը, և երկրում ստեղծվում է քաոսային վիճակ²: Դրա հետևանքով, փաստորեն, քայքայվում է պարսկական միասնական պետությունը՝ առավել ծանր և անորոշ վիճակ ստեղծելով տարածաշրջանի քրիստոնյա ժողովուրդների, այդ թվում՝ հայերի համար: Ռուսական պետության հզորացումը և տարածաշրջանում հաստատվելու քաղաքականությունը հայ ազատագրական միտքը սեռում են դեպի այդ հզորացող երկիրը: Ռուսական կայսրությունը, ընդառաջ գնալով տեղի քրիստոնյա ժողովուրդների այդ ձգտումներին, շահագրգռված էր ամրապնդել իր հարավային սահմանները, զարգացնել առևտուրն ու արհեստները: Այս և այլ հանգամանքներով պայմանավորված՝ Ռուսական կայսրությունն սկսում է խրախուսել հայ ազգաբնակչության առևտրային և արհեստագործական գործունեությունը: Որպես հետևանք՝ Ռուսական կայսրության հարավային սահմաններին առաջանում է հայկական մի ստվար գաղութ: Հայկական գաղութի կարևորագույն խնդիրներից էր նաև ազգաբնակչության հոգևոր հարցերի կարգավորումը:

Ռուսահայ գաղթաբանի հնագույն կենտրոնն Աստրախան քաղաքն էր, որտեղ ԺԸ. դարասկզբին հայ ազգաբնակչության թիվը հասնում էր

¹ «Ջամբու, գիրք, որ կոչի յիշատակարան արձանացուցիչ, հայելի և պարունակող բնալից որպիսութեանց Սրբոյ Աթոռոյս, և իւրոյ շրջակայից վանօրէիցն, համաժողովեցեալ եւ շարագրեցեալ ի Սիմէօն Գաւաիար եւ վշտակոծ կաթողիկոսէ Երեւանցոյ», Վաղարշապատ, 1873 (այսուհետև՝ «Ջամբու»):

² Տե՛ս Վ. Բայրության, Իրանի պատմություն (հնագույն ժամանակներից մինչև մեր օրերը), Երևան, 2006, էջ 380:

գրեթե 2000-ի³: 1763 թ. քաղաքի հայ բնակչությունը կազմում էր 500 տուն⁴: Մինչև ԺԸ. դ. կեսերը Ռուսական կայսրությունում հայերը կազմում էին եկեղեցական առանձին թեմ, որի առաջնորդ եպիսկոպոսը նշանակվում էր Մայր Աթոռի կողմից՝ միաժամանակ հանդիսանալով նաև Ս. Էջմիածնի նվիրակ⁵, այսինքն՝ նրան էր վերապահված նվիրատվություններ հավաքելը և դրանք Մայր Աթոռ ուղարկելը: Ըստ «Ջամբու»-ի՝ այդ իրավիճակը փոխվել է Ղազար Ջահկեցի կաթողիկոսի գահակալություն ժամանակաշրջանում, երբ 1749-ին տեղի հայությունը դեմ է դուրս եկել Ս. Էջմիածնի ներկայացուցիչ Բարսեղ եպս. Փառակեցուն⁶:

Այդպիսով, 1749-ից Ս. Էջմիածինը կորցրել է Աստրախանի թեմի նկատմամբ հոգևոր իշխանությունը: Դրանից հետո թեև նվիրակներ էին ուղարկվում Աստրախան, սակայն տեղի հայությունը, ըստ երևույթին, գտնվում էր Գանձասարի կաթողիկոսության իշխանության ներքո: Ուշագրավ է Մաղաքիա արք. Օրմանյանի տեսակետը հետագա իրավիճակի վերաբերյալ, ըստ որի՝ Ղազար Ջահկեցուն հաջորդած կաթողիկոսները «կարեւորություն չտուին» այս հանգամանքին⁷:

Ըստ Սիմեոն Երևանցու՝ այդ իրավիճակն անփոփոխ է մնում շուրջ երկու տասնամյակ, երբ Ս. Էջմիածինը չէր կարողանում իր եպիսկոպոսներին ուղարկել Աստրախան, իսկ նվիրակները մեծ դժվարությամբ էին գործում՝ հանդիպելով Գանձասարի կաթողիկոսության ներկայացուցիչների դիմադրությանը: Կարելի է արձանագրել, որ հետագա տասնամյակների ընթացքում ռուսահայոց թեմը, մասնավորապես Աստրախանը գտնվում էր Գանձասարի կաթողիկոսության ենթակայության ներքո: Այս հանգամանքը որևէ կերպ ընդունելի չէր կարող լինել Սիմեոն Ա. Երևանցու համար, քանի որ նա Ս. Էջմիածինը դիտարկում էր որպես հայ ժողովրդի միասնականության կենտրոն՝ այս տեսանկյունից մոտենալով նաև ռուսահայոց թեմի խնդրին:

Պետք է նշել, որ Ս. Էջմիածնի՝ ռուսական արքունիքի հետ փոխհարաբերությունների հաստատման առաջին քայլերից մեկը կատարել է Հակոբ Շամախեցի (1759–1763 թթ.) կաթողիկոսը դեռևս 1760-ին: Նրա

³ Տևյա Յ. Խաչատրյան, Население армянской колонии в Астрахани во второй половине XVIII в., ССГ, 1965, № 7, էջ 78:

⁴ Տևյա Պ. Չորանյան, Հայ-ռուս-վրացական փոխհարաբերությունները ԺԸ. դարի երկրորդ կեսին, Ս. Էջմիածին, 2006, էջ 224:

⁵ Տևյա «Ջամբու», էջ 38:

⁶ Անդ, էջ 39:

⁷ Մաղաքիա արք. Օրմանյան, Ազգապատում, հ. Բ., Ս. Էջմիածին, 2001, էջ 3530:

դիմումը⁸ ընդհանրական մի խնդրանք էր կայսրուհի Ելիզավետա Պետրովնային, որ վերջինս «ականջալուր լինի հայերի, վրացիների և մյուս քրիստոնյաների պաշտպան» վրաց թեյմուրազ Բ.(1744-1762 թթ.) թագավորի պատվիրակության խնդրին⁹: Գործնական որոշակի խնդիր չպարունակող այս դիմումը որևէ պատասխան չի ունենում: Մինչդեռ՝ Սիմեոն Ա. Երևանցին իրագործում է որոշակի քայլեր, որոնց նպատակն էր ոռոսահայոց թեմը Ս. Էջմիածնի ենթակայությանը վերջնականապես վերադարձնելը: Խնդիրը լուծելու համար պահը շատ հարմար էր ընտրված: Այդ ժամանակ Գանձասարի աթոռը փաստացի պառակտված էր. չնայած դրան՝ Գանձասարի Իսրայել կաթողիկոսն Աստրախան է ուղարկում իր նվիրակ Խաչատուրին: Իր հերթին Սիմեոն Ա. Երևանցին ուղարկում է իր նվիրակին՝ Հովհաննես վրդ. Քանաքեռցուն¹⁰: Ս. Էջմիածնի նվիրակը ոչ միայն չի կարողանում որևէ կերպ հակազդել Գանձասարի աթոռի ներկայացուցչին, այլև «նրան անպատուում էին և չէին ընդունում»¹¹: Սիմեոն Ա. Երևանցի կաթողիկոսը 1764 թ. Աստրախանի առաջնորդ Ստեփանոս վարդապետին գրած իր ուղերձում պատվիրում է՝ «...վասն գանձասարցոց ապօրինաւոր նուիրակացն, զի մի տեղի տայցէ եւ ընդունիցի»¹²:

Դեպքերի հետագա զարգացումը հնարավորություն է ընձեռում Սիմեոն կաթողիկոսին՝ առավել գործուն զբաղվելու Աստրախանի թեմը Ս. Էջմիածնին ենթարկելու խնդրով: Դա մեծապես պայմանավորված էր նաև Գանձասարի հակաթոռ կաթողիկոսների՝ հայրապետի հովանավորությունն ու նրա հաստատումն ստանալու ձգտմամբ: Ըստ Մաղաքիա արք. Օրմանյանի՝ ոռոսական արքունիքին դիմելը Սիմեոն Ա. Երևանցի կաթողիկոսը հաջողեց միայն 1766 թ.՝ «Յովհաննէսը հնազանդութեան բերելով, եւ Իսրայէլը աթոռազրկութեամբ եւ բանադրանօք տկարացնելով»¹³:

Թեև աղբյուրներում ոռոսական արքունիքի հետ փոխհարաբերությունները հաստատումը հիմնականում պայմանավորված է Աստրախանի թեմի խնդրի կարգավորմամբ, այդուհանդերձ, ինչպես Լեոն է նշում, Հա-

⁸ Стів «Армяно-русские отношения во втором тридцатилетии XVIII века», сборник документов, том III, отв. ред. В. Восканян, Ереван, 1978, էջ 333, վավ. 228:

⁹ ՄՄ, «Կաթողիկոսական դիվան», թղթ. 243, վավ. 18:

¹⁰ Стів «Ձամբո», էջ 39:

¹¹ «Դիւան հայոց պատմութեան», հրատ.՝ Գիւտ քիւյ. Աղանեանց, գիրք Գ., «Սիմէոն կաթողիկոսի Յիշատակարանը, կենսագրութեամբ եւ յաւելումներով ու ծանօթութիւններով», Թիֆլիս, 1894, էջ ՃԻԵ. (այսուհետև՝ «Դիւան հայոց պատմութեան», գիրք Գ.):

¹² Անդ, էջ 84:

¹³ Խոսրը Գանձասարի հակաթոռ երկու կաթողիկոսների մասին է. տնւ Մ. արք. Օրմանեան, Ազգապատում, էջ 3531:

յոց հայրապետը նպատակ ունեւ Ռուսաստանի «ցիրուցան համայնքներին մի թեմ կազմելու և Էջմիածնի իրավասության տակ դնելու»¹⁴։ Դեպքերի հետագա զարգացումը ցույց է տալիս, որ կաթողիկոսի դիմումը ռուսաց կայսրին և Ս. Էջմիածնի առաջ քաշած խնդրանքը միայն Աստուրխանը Գանձասարի ազդեցությունից հեռացնելու միտում չեն ունեցնել։ Դրանք իրապես ռուսաստանյան հոգևոր թեմի խնդիրները կարգավորելու նպատակ են հետապնդել։

Սիմեոն Ա. Երևանցին այդ կարևոր առաքելությունը նախապատրաստվել է ամենայն մանրամասնությամբ։ Եվ պատահական չէ, որ Հայոց հայրապետը գումարում է եպիսկոպոսաց ժողով, որը և որոշում է դիմում հղել ռուսաց կայսրին¹⁵։

1766 թ. Պետերբուրգ է ուղարկվում դեսպանություն՝ Դավիթ վարդապետի գլխավորությամբ, որն իր հետ տանում էր կաթողիկոսի դիմումը՝ ուղղված Եկատերինա Բ. կայսրուհուն (1762-1796 թթ.)։ Այդ դիմումով Սիմեոն Երևանցին ներկայացնում էր ռուսահայոց եկեղեցական գործում Ս. Էջմիածնի հստակ դիրքորոշումը և իր խնդրանքը։ Կաթողիկոսն իր ուղերձում նաև մանրամասն բացատրում էր Ս. Էջմիածնի առաքելությունը և հայ ժողովրդի հոգևոր կենտրոնի նշանակությունը. «...քանզի յայտնի է տերութեանդ Ձերում, որ բոլորի ազգիս հայոց միմիայն է պատրիարքութիւն, որ սկսեալ է ի սրբոյն Գրիգորէ Լուսաւորչէն մերմէ, որոյ պատրիարքարանն է քաղաքս այս Վաղարշապատ եւ Աթոռն նորին՝ լուսակերտ տաճարս այս սուրբ Էջմիածին, յորմէ բոլոր ազգս հայոց կախեալ կան, ուր և իցէն, եւ որոց եկեղեցիք եւ դէտք եկեղեցեաց, վարդապետք, քահանայք եւ ամենայն ժողովուրդք ըստ ամենայնի ընդ հրամանաւ սորին պարաւանդին եւ շարժին որքան առ հոգեւոր եւ եկեղեցական գործ»¹⁶։ Ներկայացնելով Հայ եկեղեցին պառատկող ուժերը՝ հայրապետը հայտնում էր կայսրուհուն, որ արդեն «ԺՁ. և ԺԷ. ամ է, յորս սրբոյ Աթոռոյս հոգեւոր իշխանութիւնն ամենեւին բարձեալ է ի ժողովրդենէ մերմէ» և Ս. Էջմիածնի հոգևոր պաշտոնյաների մոլտքն արգելված է այդ երկրում, ապա հարցնում է՝ «...ոչ գիտեմք, թէ յիրաւի տէրութիւնդ Ձեր գիտէ, թէ ոչ»¹⁷։

¹⁴ Լևո, Երկերի ժողովածու, հ. Բ., Երևան, 1973, էջ 281։

¹⁵ Տե՛ս «Դիւան հայոց պատմութեան», գիրք Գ., էջ ՃԻԵ.։

¹⁶ «Армяно-русские отношения в XVIII веке (1760-1800 гг.)», сборник документов, том IV, под ред. М. Нерсисяна, Ереван, 1990, էջ 70, վավ. 33 (այսուհետև՝ «Армяно-русские отношения в XVIII веке», том IV)։

¹⁷ Անդ, էջ 71։

Սիմեոն Երեւանցին իր դիմումով առաջ էր քաշում ռուսահայոց թեմերի կարգավիճակի խնդիրը, այն է՝ ա. խնդրում էր կայսրուհուն, որ վերջինս իր հրովարտակով «հայկածինք եւ լուսավորչակրօնք» ժողովրդին հնազանդեցնի Ս. Էջմիածնին, բ. Ռուսական կայսրության տարածքում գործեն միայն Ս. Էջմիածնի կողմից նշանակված եպիսկոպոսները, գ. առանց Ս. Էջմիածնի կողմից նշանակված եպիսկոպոսի գիտության՝ որեւէ հոգեւորականի իրավունք չտրվի մուտք գործել հայկական թեմ: Ուշագրավ է նաեւ Սիմեոն Երեւանցու՝ կայսրուհուն ուղղված այն նկատառումը, որ «եւ խնդիրս այս՝ ոչ եթէ միայն ազգիս մերոյ եւ մեզ է օգուտ, այլեւ օրհնեցելոյ երկրիդ եւեւ ազգիդ ձերոյ եւս բարեվայելուչ ամրափակութեան սահման ըստ ամենայնի»¹⁸:

Ս. Էջմիածնի դեսպանությունը միանգամից չի հաջողել իր առաքելությունը: Ըստ աղբյուրների հաղորդած տեղեկությունների՝ Սիմեոն Ա. Երեւանցին այդ ընթացքում փորձում է իր բարձրացրած խնդիրների լուծմանը նպաստելու գործում ներգրավել նաեւ Ռուսական կայսրությունում ապրող և հեղինակություն վայելող հայ գործիչներին¹⁹: Առանձին դիմում է ուղարկում նաեւ Աստրախանի ռուսաց մետրոպոլիտ Մեֆոտիին. նվիրաբերելով նաեւ Նոյան տապանից մի կտոր՝ այլ ընծաներով հանդերձ²⁰: 1767 թ. մի գրությամբ կաթողիկոսը խնդրում է աջակցել իր դեսպան Դավիթ վարդապետին՝ «Զորս ի յաւանեալք քոյ ըստ մերոյ Հայցուածոյ, արդարեւ յարամնայութիւն է սիրոյ ճշմարիտի, զոր յուսամ իսկ, եւ կատարումն տիրական հրամանին: Քանզի ի յայս կան բովանդակեալք ումն պատուիրանք, եւ գործք հաճէլիք Աստուծոյ, զոր յարամնաց պահեսցէ տէր իւրով ողորմութեամբն»²¹:

Դավիթ վարդապետի հետ ուղարկված գրությամբ Հայոց հայրապետը դիմում է նաեւ Աստրախանի ժողովրդին՝ Ս. Էջմիածնի դեմ հանդես եկող հայերի ու Մայր Աթոռի նվիրակի միջև լարված հարաբերութունները հարթելու նպատակով²²: Արդյունքում հաջողվում է հասնել նրան, որ «Դաւիթ վարդապետն... ի հասանիլն ի Հաշտարխան՝ ըստ պատվիրանի սրբազան հայրապետին, առէալ էր զհաշտութիւն ի մէջ ժողովրդեանն եւ նուիրակին»²³:

¹⁸ Անդ:

¹⁹ Մ. արք. Օրմանեան, Ազգապատում, էջ 3532:

²⁰ Տե՛ս «Դիւան հայոց պատմութեան», գիրք Գ., էջ ՃԻԷ:

²¹ ՄՄ, ձեռ. Հ^տ 2912, 215բ:

²² Տե՛ս Դիւան հայոց պատմութեան, գիրք Գ., էջ 499-500:

²³ ՄՄ, ձեռ. Հ^տ 4479, 4բ:

Պատվիրակությունն իր առջև դրված խնդրի կատարման համար, ըստ «Ջամբու»-ի, դատարկաձեռն չէր գնացել Ս. Պետերբուրգ: Դեսպալությունն իր հետ տանում էր Նոյան տապանի, Ս. Հովհաննես Կարապետի, Ս. Գևորգի մասունքներից և Ս. Հռիփսիմյանց նշխարներից՝ չորս բաժին ոսկեջրած արծաթյա տուփով²⁴:

Սիմեոն Երևանցու՝ ռուսաց կայսեր միջոցով ռուսահայոց թեմը Ս. Էջմիածնին ենթարկելու ծրագիրը պսակվում է հաջողությունը: Բնական է, որ հայկական կողմի խնդրանքը բավարարելիս ռուսական արքունիքը հետապնդում էր իր շահերը և ուներ հստակ գրգռապատճառներ, որոնցից մեկն էլ ռուս-թուրքական հասունացող հակամարտությունն էր: Եկատերինա Բ. կայսրուհին «Հրամայե գրել զհրովարտակ առ ամենայն տէրութիւնս իւր եւ առ յամենայն ազգս հայոց»²⁵: Դատելով հրովարտակի բովանդակությունից՝ կարելի է փաստել, որ Սիմեոն Ա. Երևանցու բոլոր խնդրանքները կատարվել են:

Եկատերինա Բ.-ի՝ 1768 թ. հունիսի 30-ով թվագրված հրովարտակը մասնավորապես սահմանում էր. ա. Ռուսական կայսրության տարածքում հայ ժողովուրդը կարող էր ազատորեն դավանել իր հավատքը՝ հայ հոգևոր կանոններով ու եկեղեցական կարգերով, բ. Ս. Էջմիածնի կաթողիկոսներին էր վերապահվում եպիսկոպոսներ ու հոգևոր այլ պաշտոնյաներ նշանակելու իրավունքը, գ. առանց Հայոց հայրապետի գրավոր թույլտվության որևէ հոգևորական չէր կարող մուտք գործել կայսրության տարածք, որի վերաբերյալ համապատասխան ցուցումներ են ուղարկվում ռուս սահմանապահներին: Այս հրովարտակով Ռուսական կայսրությունը միաժամանակ իր բարձր հովանու ներքո էր վերցնում հայ բնակչությանը²⁶:

Կայսրուհին իր գոհունակությունն է հայտնում Սիմեոն Երևանցու ուղարկած նշխարների և Նոյան տապանի մասունքի համար: Նա, իր հերթին, Հայոց հայրապետին է ուղարկում թանկարժեք նվերներ՝ մի կապոց ոսկեհուռ գեղեցիկ գործվածք, երկու կապոց ոսկեգործ ժանյակ: «Ջամբու»-ից տեղեկանում ենք, որ տվյալ հրամանագիրը գրվել է ոսկյա գրերով, ընդ որում, նաև թարգմանվել է հայերեն, և երկուսն էլ ու-

²⁴ «Ջամբու», էջ 39-40:

²⁵ Անդ, էջ 40:

²⁶ Հրովարտակը պահվում է ՄՄ-ում՝ առանձին ցուցակով (ցուցակ 30, «Հրովարտակներ»), վավերագիր առաջին: Այն հրատարակվել է դեռևս ԺԹ. դարի կեսերին. տե՛ս «Մեղու Հայաստանի», 1858, թ. 45, եր. 356. նաև՝ Մսեր մագիստր. Մսերեան, Պատմություն կաթողիկոսաց Էջմիածնի ի Սիմեոնի մինչ Յովհաննէս (1763-1831), Մոսկուա, 1876, էջ 161-163. “Армяно-русские отношения”, том IV, էջ 76:

ղարկվել են Ս. Էջմիածին ու պահվել են Մայր Աթոռում՝ հատուկ տուփով²⁷։ Ինչպես երևում է՝ հրովարտակը ստանալու գործում իր կարևոր ներդրումն է ունեցել նաև Հովհաննես Լազարյանը (1735-1801 թթ.)։ Նա 1768 թ. սեպտեմբերին կաթողիկոսին ուղղված իր նամակում գրում է. «...սուրբ օրհնութեամբ Ձերով արժանի եղէ եւ կարողացայ զպիտանի եւ զօգտալի հրամանն ի գլուխ բերել»²⁸։

Ինչպես տեսնում ենք՝ ռուսական կայսրության հետ փոխհարաբերություններ հաստատելու գործում Սիմեոն Ա. Երևանցու ջանքերը ոչ միայն հաջողվում են, այլև, ինչպես «Ջամբու»-ում է նշված, Եկատերինա Բ. կայսրուհին «լիովին եւ քան զխնդրեալն առաւել կատարէ զխնդիրն»²⁹։ Այդ մասին Սիմեոն Երևանցին գրում է նաև 1770 թ. Եկատերինա Բ. կայսրուհուն ուղղված իր շնորհակալական ուղերձում³⁰։ Նա երախտագիտություն է հայտնում, որ կայսրուհին իր հովանավորության ներքո է վերցնում հայ հպատակներին։ Այս հանգամանքը հետագայում արտահայտվելու էր հայ ազգաբնակչության, մասնավորապես հայ առևտրականների նկատմամբ արտոնությունների շնորհմամբ ու հայկական գաղութների կազմակերպման խրախուսմամբ, որի հիմքերը դրվեցին 1768 թ. կայսերական այս հրովարտակով։ Այն, ինչպես նշում է Մ. արք. Օրմանյանը, «կրնանք նկատել իբր հիմն եւ արմատ այն սերտ յարաբերութեան, որ հաստատուեցաւ Հայոց կաթողիկոսութեան եւ Ռուսաց կայսրութեան մէջ»³¹։

Նշենք, որ կայսրուհուց ստացված նվերներն օգտագործվում են Հայոց հայրապետի համար հատուկ հանդերձանք և Ս. Իջման Սեղանի համար վարագույր կարելու նպատակով։ Սիմեոն Ա. Երևանցին կատարում է իր խոստումը՝ հայկական եկեղեցիներում աղոթքի ժամանակ սկսում է հնչել կայսերական մաղթանք՝ «վասն մեծապայծառ տօնախմբութեան նորին»³²։ Ընդ որում, այս կարգը գործել է մինչև Ռուսական կայսրության կործանումը՝ 1917-ը³³։ Բացի այդ՝ 1771 թ. Սիմեոն Երևանցին հեղինակում է «Գիրք հանդիսադրութեանց տօնից կայսերականաց» աշխատությունը, որտեղ ի երախտագիտություն հայերի նկատմամբ կայսերական հովանավորչության՝ «...ոչ ինչ կարէաք հատուցանել զփոխարէն. վասն որոյ

²⁷ «Ջամբու», էջ 40։

²⁸ «Армяно-русские отношения», том IV, վավ. 40, էջ 78։

²⁹ «Ջամբու», էջ 40։

³⁰ Տե՛ս «Армяно-русские отношения», том IV, վավ. 56, էջ 104։

³¹ Մ. արք. Օրմանյան, Ազգապատում, էջ 3533-3534։

³² Անդ, էջ 3534։

³³ Տե՛ս Լեո, Երկերի ժողովածու, հ. Գ., էջ 282։

զայս քան բանս շարագրեցաք վասն մեծապայծառ Տօնախմբութեան Նորին... եկեղեցականօք եւ աշխարհականօք մեծաւ հանդիսաւորութեամբ կատարեսցեն զայս կարգ»³⁴:

Կարող ենք փաստել, որ դրանից հետո Հայոց կաթողիկոսության և ռուս պետական գործիչների միջև հաստատված շփումներն առավել գործնական են դառնում: Հայոց հայրապետը հնարավորություն է ստանում հայրությունը հուզող այս կամ այն խնդրի վերաբերյալ դիմել ռուս պետական ու հոգևոր գործիչներին, ինչը հետագայում մեծապես նպաստում է հայ վերաբնակիչների խնդիրների լուծմանը և հայկական գաղութի կայացմանը:

1768 թ. Մինաս վարդապետը նշանակվում է ռուսահայոց թեմի առաջնորդ և Ս. Էջմիածնի նվիրակ³⁵: Սակայն Սիմեոն Երևանցու մոտեցումը ռուսահայոց թեմի նկատմամբ ենթադրում էր առավել գործուն քաղաքականություն: Դրանով է, թերևս, պայմանավորված այն, որ 1773 թ. կաթողիկոսն իր աշակերտ, եպիսկոպոս Հովսեփ Արղուլթյանին (1743-1801 թթ.) նշանակում է ռուսահայոց թեմի առաջնորդ: Վերջինս 1774 թ. ժամանում է Աստրախան³⁶: Այս նշանակման առնչությամբ կաթողիկոսն Աստրախանի նահանգապետ Կրեչետնիկովին գրում է նամակ, որտեղ վերջինիս ծանուցում է Հովսեփ Արղուլթյանի նշանակման մասին³⁷: Հակված ենք կարծելու, որ այս նշանակումը որևէ կերպ կապված չէր Ս. Էջմիածնի նվիրակի գործունեության հետ, քանի որ Մինաս վարդապետը, ըստ ամենայնի, շարունակել է վարել Մայր Աթոռի նվիրակի պաշտոնը: Համենայն դեպս, Աստրախանում վերջինիս գործունեության վերաբերյալ տեղեկություններ կան 1775-ից³⁸ մինչև 1777-ը³⁹:

Հովսեփ Արղուլթյանը նպատակային գործունեություն է ծավալում և մերձենում ռուսական արքունիքի, պետական գործիչների հետ⁴⁰: Արղյունքում՝ 1778 թ. ռուս-թուրքական պատերազմից հետո, հենց նրան է վստահվում հայ ազգաբնակչության գաղթի կազմակերպումը՝ Ղրիմից՝ «ի Կաֆայու, ի Բայդաասարայու, ի Ղարասուլու, ի Գոզլովու եւ ի շրջա-

³⁴ ՄՄ, «Կաթողիկոսական դիվան», թղթ. 4, վավ. 43. ՄՄ, ձեռ. Հ⁶ 7788, թերթ 4ր: ՄՄ-ում է պահվում Սիմեոն Երևանցու հեղինակած այս գործը. ինքնագիր ստորագրությամբ է:

³⁵ Տե՛ս «Ջամբո», էջ 50:

³⁶ Տե՛ս Պ. Չորանյան, նշվ. աշխ., էջ 303:

³⁷ Տե՛ս «Армянно-русские отношения», том IV, վավ. 59, էջ 112:

³⁸ Տե՛ս «Դիւան հայոց պատմութեան», գիրք Ը., էջ 446:

³⁹ Տե՛ս «Դիւան հայոց պատմութեան», գիրք ԺԱ., էջ 58:

⁴⁰ Г. Эзов, Начало сношений Эчмиадзинского патриаршего престола с русским правительством, הראשונהական թիվ եւ վայր, с. 10-11.

կայ Ղասաբայից եւ գիւղօրէից նոցին»⁴¹: Նրանք հետագայում հաստատվեցին նոր հիմնադրված Նոր Նախիջևան բնակավայրում⁴²: Այդ առումով հայտնի է 1781 թ. Ս. Աստվածածին եկեղեցու հիմնադրման առիթով Սիմեոն Երևանցու կոնդակի ընթերցումը⁴³:

Ուշագրավ են «Ջամբու»-ի այն տեղեկութիւնները, որոնք վերաբերում են ռուսահայոց թեմին: Մասնավորապես՝ 1765 թ. Սիմեոն Երևանցու կողմից կանոնակարգված հայկական թեմերի ցանկում հստակ առանձնացված է Ռուսաստանյան թեմը. «Հաշարիսան, որ է Տէրունի. ի Կոնստանտնուպոլիս Կայսրեայերն մայրաքաղաքի Պապարպոս. ի Սոսկով. ի Հաշարիսան. ի Ղալար»⁴⁴. ի Սառաֆան. ի Բորաղան. ի Չերքեզ. եւ այլ շրջակայ...»⁴⁵: «Ջամբու»-ում պատկերը գրեթե նույնն է՝ մի շարք կարևոր հավելումներով. «Հաշարիսան քաղաքն, ընդ որով են եւ սորա: Պապարպոս. Սոսկով. Ղալար. Սառաֆան. Բորաղան. Չերքեզ. Սոգրոդ. եւ նորոգ շինեալ Նոր Նախիջևան եւ Գրիգորիապոլ. եւ նորոգ սրացեալ ի յՕսմանցոց՝ Ղոնիս»⁴⁶ կոչեցեալն իրով ամենայն սահմանօրն, այսինքն է՝ Բէֆէ, Էսկի-դրիս, Ղարաաու, Ազմեշիւր, Գէօղլով, Բաղչասարայ, եւ Օրբազար»⁴⁷:

Ինչպես տեսնում ենք՝ «Ջամբու»-ի այս տեղեկութեամբ թեմի աշխարհագրական ընդգրկումը բավական ընդարձակ է: Այդպիսով, ռուսահայոց թեմը, ըստ «Ջամբու»-ի, ներառել է նաև Ղրիմի հայկական բնակավայրերը:

«Ջամբու»-ում առկա այդ կարևոր լրացումը հիմք է տալիս կարծելու, որ ռուսական արքունիքից հրովարտակ ստանալուց և ռուս-թուրքական 1768–1774 թթ. պատերազմից հետո, երբ Ղրիմը, փաստորեն, անցել է Ռուսական կայսրութեան հովանավորութեան տակ⁴⁸ և կազմակերպվել է

⁴¹ Վ. Բարխուդարյան, նշվ. աշխ., էջ 37:

⁴² Տե՛ս «Հայոց պատմություն», հ. Գ., «Նոր ժամանակաշրջան (XVII դարի երկրորդ կես-1918 թ.)», գիրք Բ. (1901-1918 թթ., հայ գաղթավայրերը, պարբերական մամուլը և մշակույթը XIX դ. և XX դ. սկզբին), Երևան, 2015, էջ 385:

⁴³ Տե՛ս Վ. Բարխուդարյան, նշվ. աշխ., էջ 55:

⁴⁴ Հայ վաճառականների մասին, որոնք հաստատվել էին Հյուսիսային Կովկասում՝ Թերեքի ավազանում, հիշատակություններ կան ԺԸ. դարի 20-30-ական թվականներից: Հայկական հոծ բնակչություն է հաստատվել մասնավորապես Ղալարում և Սոգրոդում. տե՛ս Լ. Պողոսյան, Հայկական գաղթավայրերի առևտրատնտեսական կյանքի պատմությունից (Ղալար և Սոգրոդ, XVIII դար—XIX դարի առաջին կես), ՊԲՀ, 1986, թ. 1, էջ 85-96:

⁴⁵ ՄՄ, ձեռ. Հ^ա 9120, 2բ:

⁴⁶ 1744 թ. դրությամբ թվարկված բոլոր բնակավայրերը հիշատակվում են իբրև հայաբնակ. տե՛ս Վ. Միրյանյան, Ղրիմի հայկական գաղութի պատմություն, Երևան, 1964, էջ 112:

⁴⁷ ՄՄ, ձեռ. Հ^ա 978, 162բ:

⁴⁸ Տե՛ս Ե. Дружинина, Ключ-Кайнарджинский мир 1774 года, Приложение № 3, Артикул третий, էջ 350:

հայ բնակչության գաղթ, ռուսահայոց թեմն ընդլայնվել է, ավելի ճիշտ կլինի ասել՝ Հովսեփ Արղունյանին է վերապահվել նաև Ղրիմի թեմերի ղեկավարման իրավասությունը:

Այն, որ «Ջամբռ»-ում նախատեսված է եղել մանրամասնել ռուսահայոց թեմերի վերաբերյալ տեղեկությունները, այն էլ՝ երկու գլխի շրջանակներում, երևում է բնագրից, որտեղ դատարկ տեղ է թողնվել նոր գլուխներ ավելացնելու և դրանց թվահամարները լրացնելու համար. «... զորոյ գլխովին որպէսն ի (...) եւ ի (...) գլուխն տէսցէս»⁴⁹:

Ամփոփելով՝ նշենք, որ «Ջամբռ»-ը ռուսական պետության հետ փոխհարաբերությունների հաստատման վերաբերյալ կարևոր տեղեկություններ է ընդգրկում, որոնք որոշ դեպքերում բացառիկ են և շատ արժեքավոր:

РЕЗЮМЕ

В статье по сведениям «Джамбра» Симеона Ереванци и других источников исследованы вопросы установление взаимоотношений Св. Эчмиадзина Российской империей. В связи чем был также урегулирован вопрос о юрисдикции армянский епархии в России. В статье также представлены основные вопросы деятельности Армянской делегации, практические цели обращения к Екатерине Второй и основные значения ее указа. Изучены также вопросы связанные с армянской епархией, вопросы ее управления, деятельности «нвираков» и дальнейшее расширение епархии в связи с ситуацией сложившейся после русско-турецкой войны (1768-1774 гг.).

SUMMARY

On the basis of Simeon Yerevantsi's "Jambr" and other information sources in this article was examined the establishment of relationships between Mother See of Holy Etchmiadzin and the Russian Empire, which has also settled the question of the jurisdiction of the Russian - Armenian dioceses. In the article are presented the delegation problems to Russia sent by Simeon Yerevantsi, the main goals of the request to Empress Catherine II of Russia and her published edict's practical significance. In terms of the issue are observed also Armenian dioceses, their management, the activity of nviraks and further expansion questions of the diocese, which got significance especially in the period of created situation after the Russian-Turkish war in 1768-1774.

⁴⁹ ՄՄ, ձև. Հ^մ 978, 162p: